



VOL I NO 50

April 30, 1976

LAW DAY

EBEYE (LER) - Ekkar non rainin, April 30, 1976, ear wor juon kemem ear komon non kaibujuij ran in Law Day eo an dri America im dri Micronesia. Inem ilo ien in ear lon jet dri konono ro kar kir ir non e. Jet ian ro rar bok konair ilo ien in rar: Jalle Bolkeim; Magistrate, Ebeye Municipality, Mr. Brown, Dist Associate Judge, Dist Attorney Mr. Earwicker, Dist. Public Defender Mr. Lowe, ~~XXX~~ Congresswoman C. M. Bigler eo ej itok ikijen COM, Congressman T. Loeak eo ej itok ikijen Nitijela kab Iroiij Løjellan Kabua, Kab Komja eo ad me ear lolorjake ien in bwe en maron in komon Mr. Larry N. Edwards.

Je konan bareinwot lelok aduij nan in kautej im kamolol dri utiej rein ad. Ij bareinwot kile bwe juon men in ad utiej buru bwe rar bareinwot kejekron ien ko air raurok im eoron kir in.

Jej buromoj bwe ejjab aoleperuij jar maron in ber ilo ien in, jet rar utame im ber wot imokō ij jet rar ber ilo jikin jermal ko air, mekarta, mene ar eindrein, jej likit ad nan in kamolol ro rar ber im kwelok non kejuij jimor. Im jej tomak bwe jej ber wot ilo juon wot bebe im lemnak.

(lale col-2)

Jej bar elij nan in kamolol non ro rar bok kunair im lolorjake ien eo bwe en juon ien eo emon im bolemen.

OKTAK ILO SOCIAL SECURITY SYSTEM EO AN TRUST TERRITORY.

Jino jen July 1, 1976 enaj wor jet oktak ko ilo program eo an Social Security im renaj jelet aolep dri jermal ro, ro rej kejerbal ir, ro im emoj air retire, family ko an dri jermal ro remij im ro rar jeren jen jikin jermal ko an kien.

Aolep dri jermal ro kajojo ilo Trust Territory, jedron jen ia, renaj aikuuj in dreton iumin Social Security System eo an Trust Territory - ro wot im ebar wor juon system eo rej ooj none rejab maron dreton oloan karok in, einwot dri America ro rej ooj non Social Security System eo an United States.

Enaj bareinwot wor laplok ikijen money ko an armij ro kajojo im emoj air retire im ro renaj retire tok elik.

Emoj an bareinwot wanlinlok oran eo ikijen wonen juon dri jermal non an ooj non Social Security jen \$900 lok non \$1,200, im bareinwot wanlinlok jen juon percent (1%) lok non 1.5% employee im 1.5% employer. Itok non Office eo an SSO.

LETTLER NON EDITOR

Dear Mr. Editor,

Bwelen emwij an kar walok kin we-  
win likao ro 2 rar etal (tourist)  
lok non Majuro. Lomarein ejap arm-  
ij bata, elukunin jijjet bwe Nit-  
ijela ran ren kar etal in wonmaiki  
erro im kir irro non kejota eo air  
eliktata, kinke, baj lale mok, won  
ran ilo Nitijela im won lomarcin  
2 rar etal ilo tourists? Ne kojaje  
eokwe katak mokta geografyy in Ma  
rshall inem kwonaj melele.

Likao rein jineir im jemair rar  
jab najidriki irro wot mona ko re-  
nno im kal ak rar bar katakin irro  
manit, etta buru, tiramo, jelelok-  
ijen, bareinwot. Likao rein molke  
ro ar jijet dro iloan plane eo, ak  
ien eo ke ej alikar ke elap an ov-  
er passengers ilo ien in ledrik ro  
ilo wa es rej konono im kajitok  
bwe aikuuj to 2 armij ilo ien in  
ewor kara ro rar iwe jen Majuro  
rej itok kin mission ko an Church,  
lemnak eo iben likao rein bwe irro  
en volunteer jutak im make kalikar  
ke irro eo irro ej to jen trip in  
inem irro ar to bwe irro ejap ko-  
nan bwe ro jet ren loose i progra-  
ms ko air im trip in.

Mal ke ejeja an walok armij rot in  
ilubwiljin armij, ak kinke likao  
rein ejap armij bata, ejap raelep  
e an armij jela kajierro, kar baj  
jen etto wot jen jinoin wot airro  
kar baj (popular) ilo kajin Japan  
"NINEKIMONO". Kinke jiner im jem-  
air ejap kar armij wan kar baj  
jetro armij. Bwelen emon lok ne  
kwon lale bible ne am, lale mok:  
Filippai 2:3. "Komin jab komon ja-  
brewot ilo walok ak aibuijuij jekd  
ron, a kin etta buruomi jabrewot  
en lemnak ro jet remon jen e. Mat-  
thew 7:3-6 "Im eteke kwoj kalimjok  
belok edrik iloan mejen jeim im  
jatim a jab lemnak kin wijki iloan  
mejam? A ekijkan am ba non jeim im  
jatim, in jolok belok edrik jen  
mejam, im lo wijiki ej bed iloan  
mejam? Kwe dri jela mon, kwon jol-  
ok eo jen mejam mokta. Inem kwonaj  
lolokijen im jolok belok edrik jen  
mejen jeim im jatim. Komin jab  
(lale col-2)

lelok men eo ekojarjar non kiru  
rorror ko, im jab julok bor ko ami  
iman pik ko, ne rab juri kin lob-  
iren neer, im oktak i, kakurre kom.

Ij lelok ao kamolol likao rein kin  
airro kar vonunteer im to ilo trip  
in bwe ro jet ren maron in jab loose  
ien ko air iben family ko air ak  
ien ko air iben ro jerair. Jej lo  
bwe tourists rein 2 rar jab kautej  
irro make ak itbo ar tiriamo kin  
ro jet. Komro kanuij emmol, ejimwe  
an jinimiro im jememiro kar katakini  
komrol!!!

JCK

\* \* \* \* \*

JORREN EO NAE DRI-RONGELAP

Itijen jorren eo ear walok nae dri  
Rongelap ilo an kar dri America  
test H-Bomb eo ilo Bikini ikottan  
5 im 6 awa jimarokin March 1, 1954.

Moktata, ear walok lintak juon me-  
ram jen ion aijet ituion-turilik in  
Rongelap Atoll. Ear jino walok im  
ererak im kabwe aolepen mejatoto--  
ejelok meram einwot meram eo. Elon  
kain color ko raibuijuij im kalujoj  
ilo lali.

Ke ej jakolok meram eo, juon baat  
ej walok im bar ererak im kabwe lan.  
Ke ej driklok baat eo im nanin jako  
ej kab rub im edebokbokkifrainik-  
en elap im kammijak wot.

Armij ro rar jujen wot em ruj jen  
kiki kin lelnon im wiwijet. Jet rar  
ko non bulon mar im tilekek. Rar  
lemnok ej ran eo elik im ilo ba  
kake, jet rar ukwelok ak oktak wot  
ile ien eo.

Ilo kotaan in, 6 lok non 10 awa  
jibbonen ran eo, ejelok bar men  
ear walok. Armij rar jino etal non  
jербal ko air - enod im men ko jet.

Elkin 10 awa jibbonen eo, ejjino  
wotlok powder im tab mejatoto. Ilo  
torein ear ketok 3 palun kotto im  
ekekke ion Rongelap im armij ro rar  
lemnok bwe unin an wotlok powder im  
(lale p-3col-1)

5009861

ab mejatoto, palun ko rej unoke. Armij ro rar bwir im duwoj jen mo-ko imeir im aluji palun kein. Inem rej jino enjake an metak mejeir einwot ne jej bclok. Powder eo ear lab lok wot im ej wotlok einwot snow. Manlok wot non 3 im 4 awa elkinraelepen ran eo, powder eo ej kabwe im kalbubu ion bwidej im keinikkan, im ene ko jimettan mile tolok, rehan loi.

Ilo 10 awa bonin eo, armij rar jino enjake air naninmij laptata non ajiri ro, ro rar kauotata im kaburomojmoj. Naninmij ko rar buki einwot, ebwenojnoj, abnono, jiemtak, molanlon, metak bar, metak lojilni, metak ni im aolep eketak ko ilo enbwin, ko im rar jab maron emak-itkit kaki.

Rujlok non ran eo juon, March 2, 1954, Magistrate eo im ro jet rar etale jorren eo im lo ke armij ro rar naninmij jen mona im dren ko rejorran. Color eo ilo dren in dak ko enanin einwot yellow en ekilmej im nemen, emco lok jen kabwijlon. Kinmenin dri-tel rein rar kabwijrak armij ro jen mona im idrak, botab, rerumij kinke emotlok 24 awa jen ke ear walok jorren eo.

Ilo 3 awa elkinraelepen ran eo, ar kelok juon palun in lojet jen Eno-wetak. Ruo wot armij rar toenetak. Armij ro rar kajitok ta-aerro jerb-al. Uak eo aer rar ba ke rej iten lale ewi kajur in an bomb eo jerb-al. Rar bar ba ke 20 wot minute in air bed iene. Botab ear iet jen 10 minute. Rar etal wot im likit kein kakolkol poison eo air na ilo juon aibwij lal im mokaj im rol. Ejelok juon nan in kakkol non armij ro.

Ilo jibbon tata in ran eo juon, March 3, 1954, ear walok juon wan tarinae im ektake ir non Kwajalein. Ke rej emakit jen Rongelap rar etal mokta im bok 15 armij ro rar bed ilo Ailingae im itok wot non Kwajalein. Ilo ran eo, ej jino walok jet kain naninmij iben armij ro. Jet men einwot book in kijeek inbwinier, kwoj botoktok iakkin neeir im peier, im jino wotlok (lale col-2)

kolan borair.

Ke rej tokektok ionenin Kwajalein, March 4, 1954, ejelok juon uno ak komadmod rar lelok non ir ak men eo drein, bwe ren tutu iar jilu alen juon ran.

Ilo March 6, 1954, doctor ro an AEC rar tokektok ibeir ion Kwajalein. Rar bed ibeir iumin juon allin im jet ran. Ilo kotan in ejelok uno, botab komadmod eo drein, bok botoktokier im lutoklok.

Jen 1954 non 1965, ejelok juon uno renanin kar lo non naninmij in. Ilo 1966, rej kab lo juon uno ekkar non naninmij in. Uno in eo naetan synthroid. Uno in ewor ruo wewin. Bwe elane rejamin idrak unoin renaj mij. Im elane renaj jolok juon allen air idrak, melelen bwe rej jolok juon ran in air mour ilo lal in, Uno ejab maron jolok ebwoj eo iburuon armij rein. ak maron lukun kemmour armij jen poison in bomb eo.

Enin ej jinoin an dri Rongelap drelon ilo juon jorren eo im ear walok non ir ilo 1964 mantak non rainin. Ejanin wor juon komadmod eo dri America remaron in lukun kemour er jen poison in bomb,

J. A.

LOAN EBEYE RAININ STAFF

EDITOR ..... Steve Muller  
ASSOCIATE EDITOR ... Damien Ishoda  
Isaac Jorlang  
PRINTER ..... Edison Kojje  
STAFF ..... Irene Abraham  
Miram Antibas  
Toj Lain  
Keslor Bolkeim  
Herinos Enos  
ADVISOR ..... Larry Edwards